

東

華

錄

東華錄

康熙四十八

臣王先謙敬編

臣周瀚蕃恭校

秋七月甲申朔奉差兵部郎中格什等奏臣等至甯夏會同將軍尼雅翰等率領西安滿兵全軍總兵官一員領綠旗官兵四千往追巴圖爾額爾克濟農副都統柏天郁總兵官馮德昌等率兵出大威口追及巴圖爾額爾克濟農於阿里渾烏素之地再三諭令遷移巴圖爾額爾克濟農不從旋即遁去臣等隨報將軍將軍分兵爲三隊追之至西喇布里圖將宿臣等言當乘夜追及誅之次日往追則難及矣將軍不聽次日追三十餘里第三日至庫克布里圖度不能及遂率兵還臣等度巴圖爾額爾克濟農必西去臣格什往甘州等處地方臣二郎保往涼州等處地方探視巴圖爾

額爾克濟農駐牧之地奏入 上命刑部侍郎邁塗前往察審尋邁塗審取口供具奏下部議兵部議覆尼雅翰稽遲怯懦失誤軍機應革去將軍並拖沙喇哈番不准折贖鞭一百副都統柏天郁革去副都統郎中格什員外郎二郎保俱革職總督葛思泰係封疆重臣部檄到日應卽會同將軍尼雅翰等速議乃遲誤軍機遣大臣往訊始云曾諫將軍尼雅翰巧飾具奏殊爲不合應將葛思泰降二級調用得旨柏天郁葛思泰俱降五級畱任將軍尼雅翰著逮至京監候絞格什二郎保革職尼雅翰等所率往官兵令總督葛思泰暫轄駐紮甯夏○戊子以圖納哈爲內閣學士由祭酒遷○禮部奏朝鮮國使臣違禁私買一統志書應將內通官張燦革職發伊國邊界充軍正使李沈副使徐文重等失於覺察並應革職朝鮮國王李焞姑免議得旨李沈徐文重等從寬免革職餘如議

○甲午理藩院奏喀爾喀人等既與四十九旗同列則眾扎薩克自親王以下驍騎校以上凡請安進貢奏事或遣使或親來俱應照四十九旗例土謝圖汗車臣汗旗內自王以下驍騎校以上凡行事亦應與四十九旗同土謝圖汗車臣汗其身僅存汗號應令進九白之貢其來使仍令照前例行澤卜尊丹巴胡土克圖之使亦令照前例行奏入 上曰喀爾喀人等初降新行安插俟三年後依此議行澤卜尊丹巴胡土克圖亦著貢九白○戊戌諭兵部歸化城兵無事當撤著都統郎談副都統碩鼐於在彼大臣內酌帶一員沿邊直至甯夏延綏西甯往勘大軍可行可止之地至於巴圖爾額爾克濟農前者來歸給地安插而養之助喀爾喀往征厄魯特竟不爲效力且劫奪喀爾喀之事甚多灼知其必不能改故令遷徙居察哈爾之地奈彼素藏禍心是以遠遁朕以向加養

育初無困之殺之之意欲居何地惟其所擇但不得擾害邊塞地
方可令達虎書此原由遣人往諭巴圖爾額爾克濟農著一併議
奏尋議今歸化城兵無事應撤但畱在歸化城之厄魯特尙未去
應撥每佐領護軍二名火器營兵四百名照兵數派官在歸化城
周圍暫駐餘俱撤回此所畱兵俟頭隊厄魯特起程後卽回其調
大同宣府綠旗官兵亦令各回汎地暫畱大臣伏候 上命應著
達虎鈔膳敕諭遣發巴圖爾額爾克濟農俟彼作何回覆卽令奏
報得旨著都統喀岱李正宗副都統田象坤卽化麟畱後將軍印
交與喀岱參領諾爾孫達米納夸塞蘇丹古爾哈著與卽談偕往
勘視大軍可行可止之地事畢著卽談等一二緊要之人乘驛先
來入奏○己亥以衛旣齊爲左副都御史由順天府尹遷○丙午土謝
圖汗奏 皇上仁恩臣與子及所屬人民不勝歡忭臣思得膏腴

之地竭力春耕以資朝夕得旨來年春著理藩院遣官一員指授膏腴之地令其種植○己酉予故保和殿大學士杜立德祭葬加祭一次諡文端○諭大學士等杜立德在世祖皇帝時居官早著賢聲稟性厚重行事正大非若他人之徒務虛名也朕任用多年老成恪慎如遇事得其情理從不肯苟隨同列必於朕前直言敷奏從前在任時陳奏之處頗多可謂賢臣矣

閏七月甲寅朔盛京刑部侍郎鄔赫以偷安溺職降五級以盛京武職效力○丙辰四川陝西總督葛思泰奏臣差甘肅副將陳祚昌等哨探至昌甯湖有巴圖爾額爾克濟農之弟博際遣親信喇嘛格隆等來言素蒙 皇恩不敢背負今請在昌甯湖牧馬陳祚昌度其將往西海借名牧馬緩我軍機隨將格隆等監禁一面報臣及總兵官甘肅總兵官柯彩調遣遊擊李士達等領官兵四路

進勒大敗蒙古兵殺五百餘人博際遁走追躡百餘里所獲牲畜

器械無算生擒蒙古十五人並前監禁之格隆額林臣索諾木等

皆斬之下部議敘○庚申調蘇赫爲吏部尙書以庫勒納爲戶部

尙書由禮部左侍郎遷轉阿山爲戶部左侍郎以博際爲戶部右侍郎由內閣學士遷

○乙丑以明額理爲盛京刑部侍郎由大理寺卿遷思格色爲內閣

學士由翰林院侍讀學士遷○己巳以尹泰爲左副都御史由通政使遷楊鳳起

爲湖南布政使由河南按察使遷○癸酉諭大學士等副都御史衛旣齊

前議分南北卷時因邵遠平有江浙人盡奸詐之語遂信其爲賢

而保之邵遠平謂江浙人盡奸詐伊之祖父獨非江浙人乎父爲

子隱子爲父隱直在其中果如邵遠平之言則伊祖父兄弟皆奸

詐人矣賣祖父兄弟以沽直名乃奸詐中之第一人也豈得謂之

直哉況從來賢才不擇地而生十室之邑必有忠信朱子徽州人

也紹洙泗道統之傳江浙中豈無賢者衛既齊一假道學耳認理不明中無定見是以爲其所愚也○予故吏部尙書鄂爾多祭葬諡敏恪○乙亥 上巡幸邊外啟鑾○以胡介祉爲河南按察使

由山西河東道遷

○喀爾喀西卜退哈灘巴圖爾來降授爲輔國公○壬午以甘肅布政使噶邇薩爲光祿寺卿○是月免江西南昌等五府逋賦江南海州桃源等七州縣旱災賦

八月甲午朔以吳赫爲山西布政使

由陝西按察使遷

許宏勳爲河南布

政使

由雲南按察使遷

○予故戶部侍郎賽弼漢祭葬○乙未調吳赫爲

甘肅布政使以能特爲山西布政使

由按察使遷

以佟世雍爲雲南按

察使

由廣東雷廉道遷

○辛丑以納壘爲陝西按察使

由郎中遷

○乙巳以張

志棟爲江蘇布政使

由福建按察使遷

○戊申以巴錫爲山西按察使

由御

史○貴州巡撫田雯丁母憂命回籍守制○庚戌免陝西乾州咸

陽等五州縣蝗災賦

九月癸丑以衛既齊爲貴州巡撫

由左副都御史遷

王清賢爲福建按察

使

由四川松茂道遷

○甲寅喀爾喀達拉瑪希里卓特巴來降授多羅貝

勒○辛酉

上謁

暫安奉殿

孝陵至

仁孝皇后

孝昭皇

后 孝懿皇后陵奠酒○甲子以線一信爲湖北布政使

由湖南按察使

遷

○乙丑

上還京師

○丁卯達賴喇嘛遣使德木本爾囊素奏

言前者敬遵諭旨曾遣噶爾璽西勒圖往和喀爾喀厄魯特因彼
構兵不已復遣濟隆諭和濟隆回報言喀爾喀厄魯特俱聽從立
誓矣及見 皇上敕諭內有噶爾丹爲大兵所敗認罪立誓之旨
始知噶爾丹不聽訓飭是以此地所遣人員無知無識伏乞
寬宥德木本爾囊素又述達賴喇嘛口奏云喀爾喀厄魯特交戰
之前土謝圖汗噶爾丹等遣使於西海台吉各請助兵達賴台吉

來告於我我謂喀爾喀厄魯特等和睦我則喜悅不願有所偏助也四川打箭鑪地方令西海扎什巴圖爾台吉領兵駐防非有異念今俱已撤歸矣 上以達賴喇嘛向來恭順噶爾丹事必其使臣及屬下人通同蒙蔽非達賴喇嘛意因賜敕曰朕統御宇內以愛育黎庶爲本務使萬邦共享安樂前聞喀爾喀厄魯特交惡相攻屢遣使於爾喇嘛以和兩國爾喇嘛從來奉命不違敬順而行亦屢遣喇嘛說和奉差喇嘛諸人若能仰體朕與爾好生之意盡心行事則喀爾喀厄魯特和好早息戰爭矣但爾近侍與濟隆胡土克圖等皆有私意不體朕與爾之心濟隆胡土克圖身在噶爾丹營中並不說和噶爾丹藉追喀爾喀爲名闌入邊汛刼掠烏朱穆秦又不勸阻且噶爾丹與我軍交戰濟隆張蓋於山頂觀之而報爾以爲竭力說和聽從立誓濟隆之去朕面諭以告爾喇嘛之

言亦不行傳諭以前項事情揆之未必由濟隆一人之意亦爾近侍之人通同貪利而欺蔽爾徇庇噶爾丹之所致也爾豈有如是之心乎朕灼見與爾喇嘛無涉是以朕不責汝朕向來惟以實心待爾故將若輩行事違朕與爾之意遣敕諭爾知之至噶爾丹乞兵於達賴台吉而不許駐防四川打箭鑪之兵盡撤已具悉所奏矣○戊辰調傅繼祖爲翰林院掌院學士兼禮部侍郎由內閣以學士調黃斐爲左副都御史由通政使遷○庚午諭戶部朕孜孜圖治軫切民依閭閻耕穫時勤諮訪其有以荒歉上聞者或蠲或賑旋即施行務令得所念河南一省連歲秋成未獲豐稔非沛特恩蠲恤恐致生計艱難康熙三十一年錢糧著通行蠲免並漕糧亦著停徵至山西陝西被災州縣錢糧除照分數蠲免外其康熙三十一年春夏二季應徵錢糧俱著緩至秋季徵收用稱朕眷愛黎元撫綏休

養至意○以劉樸爲湖南按察使

由廣東糧道遷

○甲戌諭大學士等河

道關繫緊要著戶部侍郎博際兵部侍郎李光地工部侍郎徐廷

璽前往查閱靳輔亦著同去靳輔於河務最爲諳練如黃河險工

不能完固則運河中河俱壞著將黃河刷底深闊及所修險工之

處從公閱看○以布喀爲內閣學士

由大理寺卿遷

冬十月庚寅四川陝西總督葛思泰奏前因謝爾素地方番人爲

盜擅發弓箭射死參將朱震等部議令臣發兵勦殺隨飭西甯總

兵官李芳述酌帶官兵馳赴謝爾素八月二十七日在棋子山殺

死賊番六百餘名生擒三十名爲首之華木爾加等審明正法下

所司知之○甲午以戴吞爲陝西布政使

由御史遷

○丙申賑阿祿科

爾沁等七旗○丁酉諭大學士等朕聞陝西西安鳳翔等處年歲

不登民艱粒食以致流移今遣學士布喀速往陝西凡被災地方

親歷查看其作何賑濟之處會同總督巡撫速議以聞○丁未先是遣侍讀學士達虎等齎敕頒賞策妄阿喇布坦阿奴等歸至嘉峪關外被阿奇羅卜臧等劫去馬駝盔甲等物兵部檄令甘肅提督孫思克發兵征討至是孫思克奏阿奇羅卜臧經臣遣發官兵征討斬殺四百餘人獲馬駝牛羊千計下所司知之○戊申工部尙書席柱高爾位侍郎伊爾格圖齊穡王承祖各降五級調用以疏濬城河估費浮多故也○是月免河南陽武等二十三州縣旱災江南興化山西岳陽等九州縣蝗災額賦

十一月丁巳以索諾和爲工部尙書

由左都御史遷

調凱音布爲工部左

侍郎

由倉場調

圖爾宸爲工部右侍郎

由盛京工部調

○以李振裕爲工部尙

書

由吏部左侍郎遷

年遐齡爲工部右侍郎

由內閣學士遷

○戊午喀爾喀扎薩

克圖汗之妻布尼達喇奏

皇上出臨會閱我與子巴郎欲赴會

所訴先祖父名爵及扎薩克圖汗被害兩大事因子身故不獲赴
會陳訴今特攜六歲之子克色克台吉而來寡婦孤兒惟 皇上
鑒恤奏入下理藩院議尋議覆扎薩克圖汗之弟策妄扎卜已封
親王克色克年幼未應受封所奏無庸議得旨扎薩克圖汗被殺
殊爲冤抑所存止此一子克色克從優授爲輔國公○己未諭吏
部從來致治之道在正人心人心偏私則詐僞日生而習俗滋敝
人心公直則囂競自息而庶績允釐朕早夜孜孜崇尚德教蠲滌
煩苛期與中外臣民共適於寬大和平之治凡大小諸臣素經拔
擢咸思恩禮下逮曲全始終卽或因事放歸或罹咎罷斥仍令各
安田里樂業遂生惟爾諸臣亦宜奉職恪共絕偏私而襄國事乃
近見內外各官間有彼此傾軋伐異黨同私怨交尋牽連報復或
己所銜恨而反屬人代糾陰爲主使或意所欲言而不直指其事

巧陷術中雖業已解職投閒仍復吹求不止株連逮於子弟顛覆
及於身家甚且市井奸民亦得借官陵侮蔑紀傷化不可勝言凡
若所行雖迹甚詭祕朕總攬機務已三十年此等情態知之最悉
儻因仍陋習益致蔓延殊非朝廷所以體恤臣工保全愛惜之意
夫讒譖媚嫉之害歷代皆有而明末爲甚公家之事置若罔聞而
分樹黨援飛誣排陷迄無虛日以致釀禍既久上延國家朕歷觀
前史於此等背公誤國之人深切痛恨自今以往內外大小諸臣
應仰體朕懷各端心術盡蠲私忿共矢公忠豈獨國事有裨卽爾
諸臣亦獲身名俱泰儻仍執迷不悟復踵前非朕將窮極根株悉
坐以交結朋黨之罪爾部可卽傳示中外使咸知朕意○壬戌轉
趙士麟爲吏部左侍郎以彭孫通爲吏部右侍郎王掞爲內閣學
士

由翰林院侍
讀學士遷

○以星安爲盛京工部侍郎

由內閣
學士遷

○癸亥以薩

海爲左都御史

由吏部左侍郎遷

○甲子差往陝西勘災內閣學士布喀

回奏地方荒歉情形

上諭戶部陝西西安鳳翔等處年歲不登

民艱粒食朕心深切軫念若不大沛恩施無以徧甦疾苦其被災

各地方康熙三十一年額徵銀米著通行蠲免又聞甘肅地方秋

收豐稔米價較平著該督撫會同詳議作何購買轉輸速行賑濟

務使比屋得沾實惠不致化離失所以副朕撫恤災黎至意○以

伊圖爲倉場侍郎布喀爲甘肅巡撫

由內閣學士遷

○命山西省撥銀二

十萬兩解赴陝西賑濟饑民○戊辰

上幸南苑行圍○以達虎

爲內閣學士

由內閣侍讀學士遷

○庚午轉布彥圖爲吏部左侍郎調沙穆

哈爲吏部左侍郎管右侍郎事

由兵部調

○辛未

上還暢春園○兵

部議覆湖廣總督丁思孔奏參均房右營守備張明令兵丁採取

薪芻以致眾怨應將守備張明革職

上諭大學士等朕思貧窮

武弁家人必少細小事務差遣兵丁凡以小事控告專管官員朕從未准行若此端一開兵丁必致相聚各處控告汎守空虛將弁亦難以管轄此本著再議具奏尋議守備張明降一級畱任罰俸一年從之○壬申以李柑爲內閣學士

由翰林院侍講學士遷

○甲戌諭禮

部自昔帝王敬天勤政凡遇垂象示儆必實修人事以答天戒頃欽天監奏推算日食當在康熙三十一年正月朔日食夫日食爲天象之變且又見於歲首朕兢惕靡甯力圖修省惟大小諸臣務精白乃心各盡職業以稱朕欽承昭格至意其元旦行禮筵宴俱著停止○乙亥以德珠爲內閣學士

由御史遷

○丙子轉朱都納爲兵

部左侍郎以舒恕爲兵部右侍郎

由左副都御史遷

○是月免陝西渭南

南州鎮原等二十三州縣河南滎陽等二十六州縣湖廣沅州等三州縣雲南昆明等十州縣直隸霸州等二十四州縣被災額賦

十二月辛巳朔諭大學士等各省輓運京師糧米除一歲所需每年存餘幾何著查明具奏又諭治道以愛民爲要而利益民生務在均霑實惠朕屢蠲免地丁銀兩思完納漕糧一項小民良苦亦欲特賜蠲徵此念已久每歲餘米若足供一二年之需則漕糧亦可酌量免徵其荊州江甯杭州等大兵駐防處所亦酌量裁畱以爲儲備民旣見霑實惠或遇水旱之年更有裨益至於運丁賴運資生若停輓運須使運丁不至困窮著一併議奏○壬午大學士等奏臣會同戶部確查米數見今倉內儲米七百八十萬石有奇足供三年給放 上曰有米如許朕意將三十一年起運之米於江甯京口杭州荊州等處酌量裁畱將三十二年漕運盡行蠲免民生寬裕於國實有裨益其下九卿確議尋九卿議覆京師根本漕糧輸輓關係國計似難輕議全蠲況五方雜處人煙湊集需用

孔多若一年停運米既不能北來百貨價值亦將騰貴臣等公議將漕米照省分府逐年輪免二三年間即可周徧無有不邀 聖恩者矣得旨朕急思軫恤民生於都城人民食用之需未曾計及九卿議是○甲申諭戶部朕撫馭區宇三十年以來早夜圖維惟以愛育蒼生俾咸臻安阜爲念比歲各省額徵錢糧業已次第蠲豁其歲運漕米向來未經議免朕時切軫懷所有京通各倉米穀樽節支給數載於茲今觀歷年儲積之粟恰足供用應將起運漕糧逐省蠲免以紓民力除河南省明歲漕糧已頒諭免徵外湖廣江西浙江江蘇安徽山東應輸漕米著自康熙三十一年始以次各蠲免一年至江甯京口杭州荊州大兵駐防地方亦應豫行積貯著將康熙三十一年起運三十年漕米各截畱十萬石存貯倉廩令該地方官敬慎守視以備需用○以佛葆爲左副都御史

由督

捕理事
官遷

○丙戌理藩院奏歸化城一帶地方耕牛八旗內佐領兩

人共助一牛其耒耜等項俱移文山西巡撫豫備 上諭所用耕

牛不必令其幫助卽於御廠內牛取用耒耜等項若令巡撫製備

將仍委之屬吏一委屬吏必致累民其鐵器著支用庫銀製造從

驛遞運送邊外木植甚多其木器卽於彼處製用夫農田者人生

之根本朕凡所至之地先察其土田邊外耕種必培護穀苗使高

其壠此皆由土性寒而風又凜冽之故不如此則穀苗不能植立

矣內地之田其壠不高各處耕種不同者皆隨其地土之宜也○

丁亥理藩院奏覆達爾河等種地積穀 上諭大學士等邊外積

穀甚屬緊要達爾河地方著交內務府派各莊壯丁耕種呼兒河

地方令五旗王等莊屯人前往耕種其籽粒耒耜耕牛皆令豫備

著派諳練農事官員前往監管布種完時酌畱耘田之人收穫其

各農夫所食米穀著於古北口所貯米穀帶去其席喇穆倫地方仍照前議令盛京人役前往耕種秋收之時有收穫多者該部將監管官員議敘具奏朕觀各處地畝肥瘠不同朕巡視南方見彼處稻田歲稔時一畝可收穀三四石近京玉泉山稻田一畝不過一石又見古北口穀田豐收之年一穗約三千粒口外近邊地方豐收之年穗幾萬粒此皆土脈不同故收穫亦異以此觀之遼爾河等三處墾種所費無幾而所穫必多矣○戊子諭大學士等近因西安等處被災已令動支正項錢糧二十萬兩賑濟著戶部侍郎阿山內閣學士德珠前往驗給務使饑民均霑實惠○壬辰諭兵部武職官員任寄封疆關係甚重必得其人始有裨益朕所簡閱素悉之員俱已次第拔擢今宜選材以備任用爾部行文各將軍總督提督巡撫及無提督省分總兵官於武職官員內副將以

下千把總以上有灼見人材勇健諳練軍務整飭營伍愛恤民卒
及行間效力曾經立功者不論本省別省見任候補限文到三日
內各舉所知保奏不必彼此會同其在內八旗漢軍官員有人材
素優嫻於約束堪任要地者亦著都統副都統保奏○己亥 上
啟鑒謁 陵○辛丑 上謁 暫安奉殿 孝陵至 仁孝皇后

孝昭皇后

孝懿皇后陵奠酒○癸卯

上謁

暫安奉殿回

鑾○丙午

上還京師○

是月免直隸永清等五十三州縣衛旱

災賦○是歲朝鮮琉球來貢○人丁戶口二千三十六萬三千五

百六十八田地山蕩畦地五百九十三萬二千六百八十四頃二

十七畝有奇徵銀二千七百三十七萬五千一百六十四兩有奇

米豆麥六百九十五萬二百八十一石有奇草二百八萬三千四

百六十五束茶十五萬七千四百五十三引行鹽四百三十三萬

五千八百六十引徵課銀二百六十九萬七千七百五十一兩有奇鑄錢二萬八千九百九十二萬一千五十有奇

東華錄

康熙四十九

臣王先謙敬編

臣周澍蕃恭校

康熙三十一年壬申春正月辛亥朔日有食之○甲寅 上御乾清門召大學士九卿等至 御座前 上取性理展閱指太極圖謂諸臣曰此所言皆一定之理無可疑論者又指五聲八音八風圖曰古人謂十二律定而後被之八音則八音和奏之天地則八風和而諸福之物可致之祥無不畢至其言樂律所關如此其大而十二律之所從出其義不可不知如律呂新書所言算數專用徑一圍三之法此法若合則所算皆合此法若舛則無所不舛矣朕觀徑一圍三之法用之必不能合蓋徑一尺則圍當三尺一寸四分一釐有奇若積累至於百丈所差至十四丈有奇等而上之

其爲舛錯可勝言耶因取方圓諸圖指示諸臣曰所言徑一圍三止可算六角之數若圍圓則必有奇零其理具在目前甚爲明顯朕觀八綫表中半徑勾股之法極其精微凡圓者可以方算開方之法卽從此出逐一驗算無不脗合至黃鐘之管九寸空圍九分積八百一十分是爲律本此舊說也其分寸若以尺言則古今尺制不同自朕觀之當以天地之度數爲準至隔八相生之說聲音高下循環相生復還本音必須隔八隨命樂人吹笛和瑟次第審音至第八聲復還本音上曰此非隔八相生之義耶以理推之固應如是上又曰算數精密卽河道開口流水亦可算晝夜所流分數其法先量開口闊狹計一秒所流幾何積至一晝夜則所流多寡可以數計矣又命取測日晷表以御筆畫示曰此正午日影所至之處遂置乾清門正中令諸臣候視至正午日影與

御筆畫處恰合毫髮不爽諸臣等奏曰臣等今日仰承 聖訓得聞所未聞見所未見不勝懽慶之至○諭直省州縣廣積貯○己巳 上幸玉泉山○庚午 上幸南苑行圍○乙亥 上還宮○丙子差往閱視河工侍郎博際等以治河事宜並圖進呈 上諭黃河沙灘消長本無定所緩水處可以設立滾水壩至急流處則滾水壩斷不可設自朕觀之其至緊要者無過於險工將錢糧實用於險工之處使之堅固斯可永保無虞矣○先是欽天監奏本年正月初一日辛亥日食查占驗有大臣黜近臣有憂等語是日上諭大學士等朕觀自古帝王於不肖大臣正法者頗多今設有貪汙之臣朕得其實亦必置之重典此皆係於人事凡占候當直書其占語今欽天監往往揣度時勢附會陳說如去年視有旱狀則用天時亢旱之占講張殊甚可傳欽天監監正諭之○丁丑

諭大學士等前者纂修明史諸臣所撰本紀列傳曾以數卷進呈朕詳晰披閱並命熊賜履校讐熊賜履寫籤呈奏於洪武宣德本紀訾議甚多朕思洪武係開基之主功德隆盛宣德乃守成賢辟雖運會不同事蹟攸殊然皆勵精著於一時謨烈垂諸奕世爲君事業各克殫盡朕亦一代之主也銳意圖治朝夕罔懈綜理萬幾孳孳懋勉期登郅隆若將前代賢君搜求其間隙議論其是非朕不惟本無此德本無此才亦實無此意也朕自反厥躬於古之聖君旣不能逮何敢輕議前代之令主耶若表揚洪武宣德著爲論贊朕尙可指示詞臣撰文稱美儻深求刻論非朕意所忍爲也至開勅時佐運文武諸臣各著勲績列傳之中若撰文臣事實優於武臣則論議失平難爲信史纂修史書雖史臣職也適際朕時撰成明史苟稍有未協咎歸於朕矣明代實錄及紀載事蹟諸書皆

當蒐羅藏弄異日明史告成之後新史與諸書俾得並觀以俟天下後世之公論焉前曾以此旨面諭徐元文爾等當知之○戊寅以董延祚爲福建按察使

由廣西蒼梧道遷

○己卯諭修明史諸臣朕自

冲齡卽在宮中披覽經史明實錄會閱數過見其間立言過當紀載失實者甚多纂修明史宜加詳酌如宏治中太后思念崇王欲令入朝此亦情理之常且所封之地初不甚遠而一時大臣及科道官員交章爭執以爲不可至云人民騷擾國勢動搖時已有旨召崇王矣竟因人言而止書言以親九族九族旣睦若藩王就封必不可召見則自古帝王所云睦族之道謂何又正德實錄載午朝罷後於御道得匿名文簿一卷傳旨詰問百官皆跪於丹墀時仆而暴死者數人暍而病者尤眾夏月雖天時炎熱何至人多暴卒且行間將士每披堅執銳勦力於烈日之中未聞因暑而致死

豈朝堂之上病渴若斯之甚耶所云盡信書不如無書此之謂矣
至於宦官爲害歷代有之明如王振劉瑾魏忠賢輩負罪尤甚崇
禎之誅鋤閹黨極爲善政但謂明之亡於太監則朕殊不以爲然
明末朋黨紛爭在廷諸臣置封疆社稷於度外惟以門戶勝負爲
念不待智者知其必亡乃以國祚之顛覆盡委罪於太監耶朕於
宮中太監止令供灑掃奔走之役一噸一笑從不假借所以數十
年以來太監皆極貧乏有不能自給者爾諸臣想亦悉知朕非信
用太監之主惟朕可爲此言作史之道務在秉公持平不應膠執
私見爲一偏之論今特與諸臣言之宜共知此意

二月辛巳朔吏部議覆山東巡撫佛倫奏原任運河同知陳良謨
告河道總督王新命勒取庫銀王新命奏參陳良謨懸欠河庫銀
兩今據陳良謨供王新命共勒取庫銀六萬七百兩請將王新命

調赴省城質審應如所請其河道總督事務暫交漕運總督董訥署理 上諭大學士等朕聽政以來以三藩及河務漕運爲三大事夙夜靡念會書而懸之宮中柱上至今尙存儻河務不得其人一時漕運有誤關繫非輕董訥爲人性刻恐其僨事靳輔熟練河務及其未甚老邁用之管理亦得舒數載之慮靳輔著爲河道總督王新命著解任遣戶部尙書庫勒納禮部尙書熊賜履前往會同該撫察審○癸未差往陝西賑濟戶部侍郎阿山內閣學士德珠自西安回入奏 上曰聞被災之民有流於襄陽者今情狀何如阿山奏曰民未曾流至襄陽聞有流於河南者自賑濟以後人民安輯且因正月兩次下雪不致流散失所 上曰正月雖雪二三月雨水不調麥田亦未可望人民流於襄陽者甚多爾未知之耳尋諭大學士等阿山爲人庸劣奉差之事不能盡心凡事啟奏

多涉兩可前同郭世隆遣往福建審事以病推諉奏內竟未列名著解任以郎中品級隨旗行走○賑山西浮山等十三州縣饑○甲申諭戶部陝西被災貧民轉徙四方者儻不加撫綏必致失所朕甚憫之其飭所在有司悉心賑濟並給貲遣還鄉里○乙酉再發山西庫銀十萬兩加賑陝西遣刑部侍郎傅臘塔督運襄陽米十萬石赴西安○丙戌轉年遐齡爲工部左侍郎以李元振爲工部右侍郎由左副都御史遷○丁亥 上巡幸畿甸啟鑾○轉博際爲戶部左侍郎調凱音布爲戶部右侍郎轉圖爾宸爲工部左侍郎以沙納海爲工部右侍郎由副都統遷○辛卯四川陝西總督葛思泰等奏西鳳二府被災饑民 皇上發銀二十萬兩賑濟又遣部臣阿山等親行驗給饑民均霑實惠正月初旬屢降雨雪麥苗將槁復甦災黎俱已得所得旨督撫係封疆大臣凡地方事宜俱應豫行

籌畫早爲區處方有裨益去年西安鳳翔等處旱災若先有積貯米穀早行奏明賑濟小民必不至於饑荒流散葛思泰等不能先事豫防積穀備賑又不卽行奏明及朕聞知遣官察看被災情形特諭蠲免錢糧復頒帑金遣官賑濟近聞饑民尙有流至襄陽等處者甚多葛思泰等不據實陳奏屢稱災黎俱已得甦不至失所過於粉飾具奏殊屬不合總督葛思泰革職留任巡撫薩弼圖革職○甲午以徐潮爲左副都御史由通政使遷○戊戌上還京師○庚子調庫勒納爲吏部尙書由戶部調轉文達爲理藩院左侍郎以滿丕爲理藩院右侍郎由內閣學士遷○癸卯調布喀爲陝西巡撫以吳赫爲甘肅巡撫由布政使遷○乙巳調馬齊爲戶部尙書索諾和爲兵部尙書以沙穆哈爲工部尙書由吏部左侍郎遷○以溫保爲內閣學士由閣侍讀學士遷○己酉以嚴泰爲甘肅布政使由給事中遷○是月免四川永

甯縣去年水災額賦

三月辛亥 上幸玉泉山○壬子調傅臘塔爲吏部左侍郎管右

侍郎事

由刑
左調

○丙辰內大臣阿爾迪理藩院尙書班迪等奉差往

邊外蒙古地方五路設立驛站請訓 上曰凡遇邊外事務皆用

蒙古馬匹不但甚累蒙古且恐事亦有誤今設立驛站雖費用國

帑日後於蒙古裨益良多亦不致遲延誤事最爲緊要特遣爾等

料理務加詳慎必將確然不易可垂永久之策籌畫而行○轉邁

塗爲刑部左侍郎以尹秦爲刑部右侍郎

由左副都
御史遷

○戊午湖廣

總督丁思孔奏請將武昌等營水師船於洞庭湖操演 上諭大

學士等武昌沙船甚少非全部之兵不必於洞庭操演朕觀京口

船隻最爲緊要事可以調發肆應當不時操演且舟戰甚難彼

此乘船對敵固難儻對敵之際倏爾登岸交鋒更難且險卽如澎

湖大敗水賊克取臺灣事後人皆視以爲易當未得之先朕豈遽以爲易且舉一事與爾等言之當吳逆變亂聞在岳州湖中官兵與賊交戰扎喇克圖查庫等九船官員齊於將軍鄂內前言我等九船進則齊進同心破賊斷不相離不諳者聞其語遂以爲誠能奮勇效力若倣此而行未有不誤事者戰陣之道彼此爭先方爲有益若互相觀望特爲各保軀命而已此九船前進並未擒獲賊船一隻則其觀望可知矣此事止可欺鄂內輩其可以欺朕乎朕曾以扎喇克圖等齊進之事詰問鄂內等俯首不能答一言朕洞悉扎喇克圖之爲人解其前鋒統領令隨征厄魯特又不冒死克敵以贖前愆反棄眾先奔立心奮勇之人豈如是乎○乙丑諭大學士等河工關繫運道民生非經歷諳練之人難以責成靳輔赴任之前朕召入內廷與之久語觀其奏對情狀大非昔比則其衰

病可知著順天府府丞徐廷璽前往協理○先是 上諭大學士等頃有喀爾喀杜楞逃來言彼向在巴圖爾額爾克濟農弟博濟所博濟經我兵掩殺徒步逃去至伊巴賴之地遇巴圖爾額爾克濟農屬下祁齊克台吉等博濟取彼馬匹及糧糗往覓其兄食盡困極自相竊奪見在額濟內地方額濟內之地距嘉峪關四日程目下西安大兵正往戍甯夏可令侍衛阿南達攜杜楞至甯夏會同將軍馬喇提督孫思克及總兵官等詳議確探聲息如巴圖爾額爾克濟農所居果近嘉峪關二郎保格什見在彼地可卽遣伊等前往招撫如抗拒不降卽選發滿洲綠旗兵剿除之至是阿南達等奏報巴圖爾額爾克濟農降 上諭議政大臣等覽侍衛阿南達等奏報巴圖爾額爾克濟農已降將遣其子來朝但其人未可深信或時序不宜馬匹羸瘦不得已而降令其子來朝往返之

際馬匹休息又復逋逃亦未可定將軍馬喇提督孫思克既身與相近目擊情形宜乘此機會共商徙入內地之策斷不可縱使復逸尋馬喇等奏巴圖爾額爾克濟農屬下人共二千二百餘口絕糧窮困已極揆其情形必不復逃上命理藩院遣官一員至甯夏令巴圖爾額爾克濟農少攜僕從乘驛而來沿途酌撥綠旗兵遞送俟朝見後遣歸尋巴圖爾額爾克濟農率其子台吉雲木春來朝優賚遣之○諭大學士等甘肅提督孫思克久歷邊地勞績素著著加太子少保給一拜他喇布勒哈番○壬申賑喀爾喀多羅郡王古祿西希旗貧戶○甲戌予故原任文華殿大學士馮溥祭葬諡文敏○丁丑修渾河隄○戊寅諭大學士等國家設立科道本諭令其陳奏得失近日不見一人條奏爾等可將科道等官傳集曉諭俾各抒所見陳奏勿隱○以噶爾薩爲左副都御史

理寺卿遷 ○改雲南永北協爲永北鎮設總兵官遊擊等員

夏四月甲申刑部等衙門議覆戶部尙書庫勒納禮部尙書熊賜履等察審原任河道總督王新命借用庫銀一案應將王新命照監守自盜律擬罪同知陳良謨侵盜庫銀應斬守備李文隆私借庫銀應絞濟甯道韓作棟私借庫銀已經還補應革職減等枷號得旨王新命等俱從寬免罪著革職 ○增雲南大理府城守遊擊一守備一千總二把總四 ○己丑發戶部帑銀一百萬兩賑陝西饑並給軍餉 ○癸巳命兵部尙書索諾和內閣學士德珠往查山西平陽府以西被災未報地方賑濟饑民 ○甲午 上巡視畿甸閱田禾 ○乙未 上還京師 ○丁酉諭大學士等陝西西安鳳翔饑荒朕夙夜軫念有從陝西往來人員必親加詢問頃四川巡撫噶爾圖來京陛見問所過陝西州縣情形噶爾圖奏稱西鳳二府

百姓流亡者多朕聞知不勝惻然應作何賑濟使饑民卽徧霑實惠爾等與九卿等確議具奏尋議陝西賑濟事宜應再遣大臣會同該督撫不論撥解銀兩及運送米石於被災州縣酌量人民多寡作速通行散給事後奏銷務使均霑實惠隨命戶部尙書王鶚工部尙書沙穆哈前往賑濟○戊戌 上幸瀛臺○己亥督捕侍郎席珠以啟奏逃人事件失查原案奏對不明降調○庚子以唐宗堯爲河南布政使

由廣西按察使遷

○河道總督靳輔奏請復建新莊

聞以利運道又仲家閘下陶家莊地方應添造一閘使兩閘行運互相洩瀉尤於黃中兩河大有裨益下部議行○辛丑 上御瀛臺內豐澤園澍懷堂召尙書庫勒納馬齊等入 上曰頃爾等進來時曾見朕所種稻田耶諸臣奏曰曾見過稻苗已長尺許矣此時如此茂盛實未有也 上曰朕初種稻時見有於六月時卽成

熟者命取收藏作種歷年播種亦皆至六月成熟故此時若此茂盛若尋常成熟之稻未有能如此茂盛者朕巡省南方時將江南香稻暨菱角帶來此處栽種北方地寒未能結實一遇霜降遂至不收南方雖有霜雪然地氣溫暖無損於田諺云清明霜穀雨雪言不足爲害也總之南北地氣不同節候各異寒暑之遲早全視太陽之遠近所以赤道度數最宜詳審欲定南北之向惟以太陽正午所到之處爲準卽指南鍼亦不能無偏設有鐵器在旁則鍼爲所引亦復不準此是一定之理今將一片石以繩懸之使之旋轉俟其既定刻記所向南北復動如前其所向南北仍復不變卽此可思其理所以凡物皆有自然一定之理庫勒納奏曰聞黑龍江日長夜短雖晚日落不至甚暗不知何故上曰黑龍江卽東北之地日出日入皆近東北方所以黑龍江夜短日落亦不甚暗

又命看澂懷堂後院所栽修竹前院盆內所栽人蕩及各種花卉

上指示曰北方地寒風高無如此大竹此係朕親視栽植每年培養得法所以如許長大由此觀之天下無不可養成之物也○

乙巳調博際爲督捕侍郎轉凱音布爲戶部左侍郎以思格色爲

戶部右侍郎

由內閣學士遷

○戊申以法爾哈爲左副都御史

由通政使遷

○

五月庚戌朔諭戶部尙書馬齊侍郎凱音布聞山西平陽府等處

雨澤霑足牟麥豐收其值必賤可遣賢能官員往彼購買豫爲積

貯不惟有益於民異日儻有需用時得所資矣隨命王維珍前往

料理○以姜登高爲廣西按察使

由陝西臨洮道遷

○辛亥飭所在有司

積貯○以戴通爲內閣學士

由大理寺卿遷

○以貴州布政使蔣寅爲太

僕寺卿○戊午以舒樹爲山西布政使

由郎中遷

○丙寅陝西巡撫布

喀奏輓運甯夏糧十萬石至今未到請敕下甘肅巡撫嚴催輓運

得旨凡積貯米穀總以備應急需支散賑濟西安鳳翔所屬被災朕心深切焦勞因令將甯夏糧石作速運往布喀前任甘肅巡撫時以甯夏道遠輓運艱難欲將長武附近州縣之糧運去自行陳請隨即允行經今數月乃布喀詐欺愚民輒稱百姓困苦邀取虛名總不竭力公事遷延推諉竟未運到頃調伊爲西安巡撫又向西安之民巧示情面請敕甘肅巡撫速行輓運以陷人於罪專事奸巧希圖名譽耽誤委任稽遲急務莫踰於此理應卽置重典以爲邀虛名誤公事者之戒但伊尙有未完之事著將布喀革職戴罪留任甯夏等處糧石令其俱親身照數速行運至西安至散賑之事布喀停其管理總督葛思泰同差往大臣協力賑濟儻布喀仍不作速運到稍有耽延定置重典決不寬宥○庚午賑喀爾喀郡王善巴旗貧戶○癸酉兵部議覆廣東廣西總督石琳等奏黎

人地方丁田無多不便設立州縣總兵官吳啟爵所奏於黎人地方築建城垣添設官兵之處應無庸議 上曰閱瓊州輿圖周圍皆服內州縣而黎人居中如果此處應取古人何爲將周圍取之而在內彈丸之地反棄而不取乎不入版圖必有深意初立州縣建築城垣有累百姓部議不准良是○以高啟龍爲四川布政使

由安徽按察使遷

六月庚辰調宋犖爲江蘇巡撫以馬如龍爲江西巡撫

由浙江布政使遷

○丙戌以王興禹爲安徽按察使

由浙江驛傳道遷

○己丑先是遣內閣

侍讀海三岱往西甯遷歸降之羅卜藏賽音台吉暫駐甯夏邊外至是理藩院奏據海三岱報稱羅卜藏賽音台吉已至甯夏邊外應遣臣衙門官一員將羅卜藏賽音台吉及其子女屬裔自甯夏驛送至鄂爾多斯自鄂爾多斯驛送歸化城附近安插到日再議

授職從之○庚寅以蔣毓英爲浙江布政使

由江西按察使遷

○乙未理

藩院奏科爾沁進獻席北卦爾察打虎兒人丁先經議政王大臣

等議每丁賞銀八十兩如不願領八十兩者每丁一年給銀三兩

今查可以披甲之丁共一萬一千八百五十餘名此內五千七百

十九丁情願每年領銀三兩其六千一百三十九丁情願領銀八

十兩其老病未及年歲者按戶各賞銀八十兩從之○戊戌以張

奇抱爲江西按察使

由貴州貴西道遷

張四教爲廣西按察使

由江西驛鹽道遷

○辛丑先是貴州巡撫衛旣齊奏黎平府屬古州司高洞苗人金

倒等隱匿罪犯拒捕殺死官吏至是衛旣齊奏黎平府高洞苗拒

捕殺官一案臣誤信知府張澈副將侯奇嵩之言會奏明發兵後

報稱進剿殺苗一千一百餘人亦經具奏今始訪聞因張澈侯奇

嵩私遣兵目索財是以苗人拒阻致斃張澈等畏罪誑飾實無拒

捕之事並無勦殺苗人之事知府張澈副將侯奇嵩見在嚴審臣
前輕信具奏亦難辭咎得旨凡事詳慎方善衛旣齊於此事輕率
發兵又稱將苗人殺敗伊自行具奏今乃云盡屬虛妄將人參劾
果何爲耶朕自臨御以來未見有如此錯誤者著遣部院堂官會
同總督詳加察審如果係知府副將之罪卽於彼處以軍法從事
苗人果不遵約束亦酌量卽行勦滅不必往返奏聞卽行完結尋
遣吏部尙書庫勒納內閣學士溫保前往察審○癸卯甘肅提督
孫思克奏台吉慙都旣與巴圖爾額爾克濟農同來降又與羅卜
藏額林臣祁齊克等潛謀逃亡欲赴策妄阿喇布坦所隨發官兵
追勦至庫勒圖地方慙都遠遁殺其所屬四十餘人擒獲男婦馬
駝等祁齊克自稱台吉同謀逃遁應正法陣擒四十三人隨祁齊
克之九人亦應正法其妻子應否解京所獲馬駝器械等物應否

賞給有功官役請旨定奪下部議尋議覆祁齊克宜正法宥其從人妻子解京其駝馬等物賞給有功將士得旨祁齊克著免死其妻子亦免解京令與巴圖爾額爾克濟農完聚餘如議○丙午賑喀爾喀達爾漢親王諾內等六旗貧戶

東華錄

康熙五十

臣王先謙敬編

臣周澍蕃恭校

秋七月壬戌貴州巡撫衛旣齊奏土官盧君寵擾害苗民肆行兇惡應請革職其長子盧大乾素行不法不便仍准承襲應以次子盧大晉承襲 上諭大學士等土司習俗各異必順其性而撫治之方爲得宜衛旣齊每拘泥書本辦事欲強土司屈從其性在山東居官時朕以其有守擢爲巡撫今觀其於土司之事屢生齟齬此等人不可專任著俟庫勒納等查審完結一併察明議奏○先是伊拉古克三胡土克圖請自察罕托灰遷其父吳巴什及弟子往居松阿喇布貝勒地方 上不許令遷歸化城尋伊拉古克三以其父病故奏請安葬 上遣理藩院筆帖式常壽偕往至是常

壽報云伊拉古克三渡黃河岔逸去理藩院以聞 上命大學士等議奏隨議覆伊拉古克三曾授總領喇嘛班第之職餼養已深理宜效力圖報而竟逃去大干法紀或逃往達賴喇嘛處或逃往青海處俱未可定應檄甘肅提督孫思克詳探如遇彼卽行擊解如抗拒卽行剿殺青海諸台吉亦應移文諭知從之○己巳喀爾喀格楚爾喀屯以屬裔來歸命隸察哈爾鑲黃旗○癸酉理藩院以效力年久撥什庫等引見 上曰伊等於事務何如侍郎文達奏曰伊等未爲司官不曾辦事 上曰辦事在人何論曾爲司官卽如文達雖身爲侍郎事情尙多未曉阿喇尼原係侍衛從未辦事自授理藩院尙書時卽能通曉事務甚是勤勞原任都統紀爾他布擢授兵部尙書觀其辦事亦優朕臨御多年何事未厯部院諸臣欲寬人罪卻不務求允當而故擬過重直待駁回旋卽改爲

無罪或注意在此而飾詞在彼實欲爲此而佯託爲彼此等處最多大凡經理事務須以持平爲當此引見諸人曾爲撥什庫差遣年久熟知蒙古性情與地方形勢俟理藩院主事缺出將伊等一併選擇具奏○乙亥 上巡幸塞外啟鑾

八月癸未調王士正爲戶部右侍郎

由督捕調

○乙酉刑部尙書陳廷

敬丁父憂命回籍守制○壬辰以王國昌爲督捕侍郎

由內閣學士遷

○戊戌以翁叔元爲刑部尙書

原任工部尙書

○辛丑以李應薦爲內閣學

士

由太常寺少卿遷

九月丁未朔甘肅提督孫思克奏員外郎馬迪奉旨差往策妄阿喇布坦臣標下守備高天福千總馬惟恆及兵三十名護行今據肅州總兵官潘育龍報嚮導蒙古巴素歸報馬迪等行至哈密距城五六里許駐紮有噶爾丹屬下蒙古五百許殺馬迪等盡劫馬

駝行李而去執原任郎中格什守備高天福千總馬惟恆並受傷未受傷兵共二十四人到哈密城據報以聞○庚戌 上駐蹕湯

泉○湖廣巡撫吳興典丁母憂命回籍守制○乙卯 上還京師○

甲子詔停今年秋決○乙丑以李國亮爲河南布政使

原任江蘇布政使

○厄魯特噶爾丹遣使額爾德尼綽爾濟請安進貢奏言前爲澤卜尊丹巴土謝圖汗之故陳奏三言乞以一言爲定初意卽欲仰請宏仁發回七旗於故土因地方旣遠糧騎不足且未歸之前凡所畱輜重俱被策妄阿喇布坦劫去諸物無存今惟恃達賴喇嘛之恩得以安集謹將從前遲久之處遣使陳奏請敕裁斷 上諭大學士等覽噶爾丹奏詞語恭順詢諸來使亦無他故今備兵而無所用似乎徒勞士卒然噶爾丹非可信之人如不之備萬一有事又貽後悔應備與否爾等與議政諸臣會議具奏大學士等議

覆噶爾丹必無他故然備兵不過略費錢糧並無所勞苦也儻有
警報自此出兵不若自大同前行甚便此軍似仍豫備大同爲宜
自京城前所豫備之兵亦仍應豫備後增撥護軍二名應請停止
得旨遣備大同每佐領護軍七名內減去一名畱於京城豫備兵
內後增撥護軍二名著停止尋敕諭噶爾丹曰朕撫馭天下惟欲
率土無事各享安樂原不欲興戎耀武荼毒生民今爾奏稱爲澤
上尊丹巴土謝圖汗之故上奏三言乞以一言爲定並請發回七
旗於故土前者爾喀爾喀厄魯特交惡相攻朕念兩國皆奉貢之
邦不忍坐視黎民塗炭遣使於達賴喇嘛令屢諭爾等和好爾不
奉朕旨及達賴喇嘛之言戕伐喀爾喀七旗喀爾喀人等紛紛離
散各無衣食皆來歸朕求生然爾違朕之旨朕並未嘗介意乃爾
復以追喀爾喀爲名深入我邊徼直至烏闌布通地方及發兵問

故爾兵輒先攘背我軍始與之戰爾大敗窘迫跪於威靈佛前誓
不犯中華皇帝屬下喀爾喀及眾民印文誓書見在見證濟隆胡
土克圖亦在及伊拉古克三胡土克圖往爾處爾頂禮達賴喇嘛
所遺佛像而設誓曰我斷不違旨矣前者深入邊境已自知罪佛
在此而敢不以我罪爲罪乎聖上卽佛天也乞姑宥我所奏亦甚
明朕以爾誓言爲信遂止各路軍馬不使窮追此亦爾所灼知也
喀爾喀人等窘迫來歸若不收養則皆至死地是以朕親出閱安
插近邊給糧米畜產以活之今尙窮困未甦死亡殆盡或一旗僅
存數人喀爾喀並無糧畜如遣回故土誰養之乎且喀爾喀人等
肯明知饑餓而歸死乎前以養喀爾喀之故曾敕達賴喇嘛遣諒
爾等達賴喇嘛亦甚喜奏言喀爾喀如此窮餓博施惠養與佛慈
悲同行聞知不勝懼忤博碩克圖原當從濟隆之言而竟不從大

君宜責而誅之乃俯憐眾生有如赤子復垂恩育今以其疏發汝
汝其視之若達賴喇嘛致書於汝或有異言爾亦陳奏可也前聞
策妄阿喇布坦與汝不睦流言未審虛實是以遣學士達祐等往
問策妄阿喇布坦請朕加恩故遣員外郎馬迪等往頒恩賜並不
欲敗爾事而遣之也所差馬迪既爲爾之人所害敕書見在爾所
爾視之自不謬也今嘉峪關報稱馬迪同行之人名巴素者歸告
曰我等八月十一日行至哈密有厄魯特噶爾丹屬下圖克齊哈
什哈哈爾海達顏額爾喀兩人爲首率兵五百許奪去員外郎馬
迪等馬駝行李戕馬迪及筆帖式撥什庫等其他兵卒亦有被擒
者亦有畱於哈密者從來爭戰之國無害往來使人之理烏闌布
通地方爾雖與我軍拒戰然前所遣使人察罕古英寨桑阿卜都
賴額克寨桑等十有餘人俱遣大臣送出境外歸還於爾果宜加

害則爾目下所遣使人朕卽不許歸何不可乎爾前所奏言朕許以澤卜尊丹巴士謝圖汗畀爾此小人欲自脫其身而有此言耳果有此旨豈不早諭爾乎况執來降之人以畀讐人有是理乎前亦嘗以此諭爾矣今爾背棄誓言索我降人喀爾喀害我奉差策妄阿喇布坦使臣馬迪諸人以此觀之是爾陽奉達賴喇嘛之言而陰違達賴喇嘛之命全棄誓言生事起釁彰彰明矣達賴喇嘛曾令爾犯我使臣索我降人乎况喀爾喀人等朕已養之數年方且俟其生聚將擇可居之地安插之爾如此背誓生事本應不納爾使逐之歸去但念爾使皆係小人必至困迫是以放入仍使貢獻市易今將爾背誓及爾人害我使臣之事詳開敕中發爾使沙哈孫巴克綽爾般齎往其餘俟市易畢遣歸其卽查明害我使臣之事及爾欲陳之言具奏與見在羈畱之人一併奏遣朕當熟籌

一策焉以上事情已頒諭達賴喇嘛矣敕諭達賴喇嘛曰朕奉承天命統御萬邦惟以人民得所爲至願是以率土有邦無不恪恭來享亦無不遵朕詔旨爾喇嘛領奉佛法濟度眾生西域蒙古亦尊奉爾喇嘛之教朕與往來通使爾歷年已久是以喀爾喀厄魯特之事朕多與爾喇嘛聞之前聞厄魯特喀爾喀交惡相攻朕遣使於爾喇嘛欲與爾共息其爭使相和好爾卽欣然發使同往噶爾丹所不啻三四矣噶爾丹竟不遵我諭和之旨而破喀爾喀以致喀爾喀窮極流亡無衣無食匍匐歸朕以求活然朕猶未嘗因拒命之故有惡於噶爾丹乃噶爾丹復借追喀爾喀爲名深入我邊境直抵烏闌布通及發兵問故噶爾丹兵又先犯我顏行我軍始與之戰噶爾丹大敗不得已跪誓於威靈佛前謂永不犯中華皇帝屬下喀爾喀以及眾民誓書印文具在見證濟隆胡土克

圖亦在迫伊拉古克三胡土克圖前往噶爾丹頂禮爾喇嘛所遺佛像而誓曰我斷不復違旨矣深入邊界實我之罪佛在此敢不自服乎聖上卽佛天也乞終宥我所奏甚明朕以噶爾丹誓言爲信止各路軍馬不使窮追此亦噶爾丹之所明知也以敕諭爾喇嘛不啻數次矣喀爾喀人等困極來歸若不收養則皆死亡是以朕親出閱安插近邊給糧畜以養之今尙窮困未甦僅有七旗之名死亡殆盡有一旗僅存數人者喀爾喀並無旗無糧儻遣歸故土其誰養之豈有明知饑餓而肯就死地者乎前以賑濟喀爾喀之故曾敕諭爾喇嘛亦遣諭噶爾丹爾喇嘛亦甚喜言喀爾喀如彼窮餓全而活之眞佛之慈悲也聞之不勝懼忤博碩克圖原應從濟隆之言而竟不從大君宜責而誅之乃俯憐眾生有如赤子仍加恩宥爾奏尙在噶爾丹違棄誓言云爲澤卜尊丹巴土謝圖

汗之故上奏三言乞以一言爲定發回七旗於故土又前聞策妄阿喇布坦與噶爾丹不睦流傳之言未審虛實故遣學士達祐等往問其故策妄阿喇布坦請朕加恩勿絕乃遣員外郎馬迪等往頒恩賜並非欲敗噶爾丹之事也今嘉峪關報有員外郎馬迪同行之人名巴素者歸告曰我等八月十一日至哈密有厄魯特噶爾丹屬下圖克齊哈什哈哈爾海達顏額爾克兩人爲首率兵五百許奪員外郎馬迪之馬駝行李器械戕害員外郎馬迪及筆帖式撥什庫等其他人員等亦有被擒者亦有留於哈密者從來戰爭之國無害往來使人之理烏蘭布通地方噶爾丹雖與我軍拒戰而噶爾丹所遣使人察罕古英寨桑阿卜都賴額爾克寨桑等千有餘人俱命大臣送之出境遣歸噶爾丹且喀爾喀人等朕方欲養之數年待其生聚擇可居之地安插之噶爾丹背棄誓言奏索

我措置已畢之澤卜尊丹巴士謝圖汗又將遣往策妄阿喇布坦
之使臣戕害以此觀之誠反覆奸頑之徒也已將彼罪備開敕內
付其貢使齎往令彼覆奏噶爾丹陽奉爾言肆爲欺罔陰則不從
爾言不奉爾敕生事妄行彰彰明甚不知爾意以爲何如今以噶
爾丹生事朕秣馬厲兵治具已畢俟噶爾丹回奏以決一策特以
此故命伊什格隆齎敕諭爾知之○丁卯 上御經筵○己巳以
桑額爲湖廣巡撫

由江甯織造遷

○壬申

上幸玉泉山大閱○乙亥

上還宮

冬十月丁丑和碩端靜公主下嫁喀喇沁杜楞郡王扎什之子噶
爾臧○己卯諭戶部陝西西安等處連歲凶荒繼以疾疫因而閭
閻失業洊致流移朕軫恤民艱焦勞宵旰自去歲冬月以來頒發
帑金蠲免正賦輓輸積穀轉運漕糧屢次特遣大臣察勘多方賑

濟念國家所重惟在養民目今秦省雖薄有秋收但民間匱乏已極儻非格外加恩無以使積困盡甦轉徙盡復陝西巡撫所屬府州縣衛所康熙三十二年地丁銀米著通行免徵從前所有積欠亦著通行豁免務俾比屋均霑實惠小民咸慶更生用稱朕子愛元元撫育安全至意○陝西巡撫布喀奏甯夏等處米石臣親身催運查原撥糧十萬石內除甯糧虧短及原參咸陽縣知縣顧梅糧道郝惟諤缺額外於九月十一日實運到西安糧九萬二千二百石得旨這欠缺米石責令布喀於限內運完如稍有遲誤卽照前旨治罪屢旨甚明今已經限滿尙欠七千餘石乃支飾報完顯屬巧辭希圖卸罪著交部嚴察議處尋議覆布喀革巡撫任交刑部差官拏解來京從重治罪得旨布喀著革任遣一等侍衛佟昌嚴拏來京○庚辰 上謁 陵啟鑾○以李天馥爲武英殿大學

士由吏部尚書遷

○四川陝西總督葛思泰以病乞休允之○壬午上

謁 暫安奉殿 孝陵至 仁孝皇后 孝昭皇后 孝懿皇后

陵奠酒○甲申諭刑部朕保父黎元務崇寬大每於刑獄之事輒

廛矜恤之懷秦省西安等處地方比歲游饑閭閻困苦業已多方

賑恤屢諭蠲租茲更大沛仁恩特加赦宥凡陝西巡撫所屬今年

秋審情實緩決人犯內除十惡及軍機獲罪不赦外其餘自諭到

日通著免死照例減等發落有見在審擬未經結案者亦如之嗣

後務令革心向善副朕法外生全至意○以佛倫爲四川陝西總

督由山東巡撫遷

○庚寅 上還京師○壬辰調桑額爲山東巡撫由湖廣調

以高承爵爲福建布政使

由江蘇按察使遷

○癸巳轉熊賜履爲吏部尙

書由禮部轉

○轉思格色爲戶部左侍郎以法爾哈爲戶部右侍郎由左

副都御史

○以沈圖爲左副都御史

由光祿寺卿遷

年遐齡爲湖廣巡撫由工

部左侍郎遷

○丁酉諭科道官言事○戊戌以張英爲禮部尙書

由翰林院

掌院學士遷

○以王燕爲江蘇按察使

由鎮江府知府遷

○庚子諭大學士等

近日光祿寺奏停薦新芽茶凡有類於此者俱宜停止其各省慶

賀表箋每次遣官齎送不惟驛遞煩擾而齎送官員亦屬勞苦朕

思凡物解京均於地方百姓有累有一件如去一病今將表箋停

其每次遣官齎送或應照朝鮮國一年一次彙送凡事皆由督撫

具奏或著督撫彙收一次彙送爾等會同該部議奏尋議覆各省

慶賀表箋應按期交該督撫彙齊齎送停止遣官從之○轉李元

振爲兵部左侍郎以徐潮爲工部右侍郎

由左副都御史遷

○辛丑以安

布祿爲內閣學士

由內閣侍讀學士遷

○壬寅

上幸南苑行圍○甲辰調

吳赫爲陝西巡撫以嚴泰爲甘肅巡撫杜喜爲甘肅布政使

由郎中遷

十一月丙午朔以嚴曾渠爲左副都御史

由通政使遷

○予故原任四

川陝西總督葛思泰祭○甲寅河道總督靳輔奏淮揚鳳徐所屬州縣地方各有開河築隄建造閘壩栽柳之處俱係民間納糧田地理應豁免錢糧至於兩河歸故道中河告成之後其黃水涸出及河湖低窪之處淤成膏腴熟地豪強占種而不納糧者亦復不少應查出升科請敕下江南督撫就近清查得旨這事遣地方官丈量踏勘恐借端擾民著遣部院堂官前往會同該督撫將應豁免應升科錢糧確查定議具奏尋命吏部尚書熊賜履前往確查○甲子河道總督靳輔引病乞休允之○乙丑工部議准河道總督靳輔奏高家堰加築小隄中河挑濬河溝增高遙隄添造閘口上曰中河甚爲有益靳輔欲挑濬河溝加高遙隄又塞張莊運口修駱馬湖東西石閘水漲之時開之使流水落之時塞之使聚其言猶可至於高家堰隄外欲築一小隄此豈可乎且承受洪澤

湖大水全惟高家堰是賴將高家堰之隄築之使其益堅則可其
外築一小隄有何益哉儻高家堰之隄衝決則一小隄能禦之乎
此皆靳輔反其向時意見而行之也○丙寅諭大學士等靳輔修
治河工不爲無益但今年老有病已就昏耄未可定耳高家堰障
淮敵黃最爲緊要作何加修以期永遠堅固著大學士張玉書刑
部尙書圖訥前往查視○甘肅提督孫思克軍政自陳得旨孫思
克簡任提督克副委任著加授將軍彈壓地方以示獎勵勞臣之
意尋授振武將軍○丁卯噶爾丹之使厄爾德尼綽爾濟色卜登
額爾克白克等挾噶爾丹書札散布內屬蒙古 上聞之賜噶爾
丹敕令來使齎歸敕曰朕統馭萬邦惟願天下之民共享昇平無
生事無作亂兼容並包誠心撫恤殘刻之事素所不爲諸國遠人
誠能恭順職貢不改其常朕益加愛惜施恩不絕若陽奉陰違狡

詐百出者朕未嘗不知亦不究竟每從寬教誠冀其改悔自新是以中外之人無論歸誠向化雖極隱密之事必來奏聞無敢欺蔽今爾所遣奉貢使人持爾書來與朕屬下蒙古告以爾語皆已奏聞於朕朕盡知之矣此等譎詐止自欺取禍而已何能欺人且朕屬下蒙古皆世受養厚恩豈能負朕墮汝計乎據爾書云爲宗喀巴之法而行朕不得不將護持宗喀巴之法爲之宣布本朝興隆之際延召達賴喇嘛至京此天下之所共知也康熙八年達賴喇嘛奏稱前蒙皇上惠賜臣敕印仗一統大君之仁慈平治土伯特國三部落而紅帽帕克木取兩族之人而去請將伊等還歸於噶爾馬朕卽降旨特遣官取紅帽帕克木發還康熙十三年達賴喇嘛奏稱巴忒馬三寶五巴克什之經請敕諭中國僧俗勿得誦習朕卽將敕禁止僧俗概不准誦習康熙十八年達賴喇嘛奏稱

謹將平治漢人土伯特蒙古之要略奏請睿覽其奏尙在葢達賴喇嘛深知朕護持宗喀巴之法故凡事直陳無隱歷年通使不絕爾喀爾喀厄魯特之人陽則誑言爲宗喀巴之法達賴喇嘛之教而行陰則違之率土皆知爾前者敗於烏闌布通之時汝屬下人皆驚懼而冒爾俱請降朕朕素無離間害人之處是以准爾誓書訓爾等以依常安處勿懷異心此伊拉古克三胡土克圖所深知也至於策妄阿喇布坦雖聞與爾不協朕但恤其貧苦加之以恩而已未嘗使與爾交惡也此皆至實之情朕思爾斷無此譎詐之事必爾下人及爾使人欺爾而離間之耳然若輩如此行事豈使爾善全之意乎爾當熟計之朕凡有所聞見卽與宣說向無隱諱特開示始末降敕諭爾知之○戊辰諭禮部朕因陝西西安鳳翔之民困於饑荒時時軫念來歲元旦行禮筵宴似宜停止著問九

卿尋九卿覆奏天下之大一隅偶爾被災自古所不能無去歲西鳳二府荒歉屢經賑濟今歲又稍有秋元旦行禮筵宴仍請舉行得旨照常行禮停止筵宴○己巳先是噶爾丹於烏闌布通之地爲我軍所敗內大臣蘇爾達與土謝圖親王沙津達爾漢親王班第等共商遣阿喇善屬下人鄂漆爾等令止噶爾丹於時眾皆疑科爾沁已附噶爾丹將軍薩布素聞郭爾羅斯吳爾圖納蘇圖台吉之言亦疑科爾沁密奏其有異心上以科爾沁臣服已久必無此意全不疑之至是烏喇佐領必立克圖往厄魯特館中遇噶爾丹使人濟爾哈郎格隆語之曰吾乃科爾沁台吉濟爾哈郎格隆問曰爾土謝圖汗之屬人否必立克圖曰我係土謝圖王親信之人濟爾哈郎格隆遂延必立克圖入其廬飲之酒使誓於佛前出書一封授之令致土謝圖王贈必立克圖貂皮一張猩猩氍毹一

件必立克圖以其事密首 上畱中尋遣內閣學士西拉召科爾沁土謝圖親王沙津來京○庚午諭大學士等朕思所參才力不及官員仍補授部院衙門殊未允當每有被參復用者仍復被參既因才力不及議處若仍補授錄用有何裨益著照伊等所降之級隨旗行走則旗下官員增多且伊等在部院辦事自能稱旗下之任至因公註誤降級之員復用若仍算前俸則不久卽升應俟復用三年後無過稱職始准算前俸則官員方知鼓勵有過者得少分別矣可將此旨明諭九卿○九卿議覆河道總督靳輔奏於黃河兩岸栽柳種草設立涵洞應如所請其挑濬河溝引水淤墊隄下積水之處又引水淤墊邳州低窪之處應令該督詳議具奏上曰引黃河內灌使淤平窪地雖云有益朕斷不肯輕信黃河水勢危險倏而彼處深此處淺倏而船被阻淤水勢變遷無定不

獨黃河爲然卽如渾河之水數十年前其流向出南苑中未幾漸徙而南在縣村落間猶去南苑未遠今則分爲二支一支出新安一支出霸州其流愈遠矣朕曾問土人云元朝欲引運河之水通京師而未果想亦有所難行耳黃河水勢湍迅欲引黃河內灌使淤平窪地事屬危險難保萬全不准行○辛未禮部左侍郎王鳳昌以病乞休允之○壬申吏部等衙門議覆河道總督靳輔奏河官之賢否得失惟總河知之最確嗣後大計如係管理河務兼有錢糧之責者總河督撫各行考覈其專係河官令總河自行考覈具題從之

十二月戊寅轉王澤宏爲禮部左侍郎以王封藻爲禮部右侍郎

原任吏部右侍郎

○壬午 上幸南苑行圍○以于成龍爲河道總督

由左

都御史

○戊子 上還宮○己丑差往貴州審事吏部尙書庫勒納

等奏貴州巡撫衛既齊身爲封疆大臣未經查出苗子實情卽行
用兵後又妄報陣殺多人應革職 上諭大學士等衛既齊既不
將苗子實情詳查明白輕信屬員報稱苗人反叛遽發兵往剿及
兵到彼地寨內並無一人乃搜獲苗人逃避山間者僅十四人衛
既齊竟奏稱與苗子對敵陣殺一千一百一十八人欺誑如此邊
地全賴督撫提鎮彈壓今巡撫以軍事如此謊奏豈不啟釁邊疆
衛既齊以忠誠道學自任今言行全不相符欺朕之人若不正法
何以治天下衛既齊應以軍法從事庫勒納等曾問彼爲何發兵
衛既齊云我一聞殺人驚惶之至遂爾發兵忠誠道學之人如此
輕舉妄動耶以此觀之衛既齊不過自爲粉飾所行皆虛全無誠
實爾等可將此旨傳諭九卿集議尋九卿議覆衛既齊啟釁邊疆
深負 皇上委任至意應立斬得旨衛既齊當封疆重任乃於地

方生事謊奏欺朕深爲可惡著差刑部司官一員提拏到日再奏

○辛卯以董訥爲左都御史

由漕運總督遷

○甲午調閻興邦爲貴州巡

撫

由河南調

○乙未調興永朝爲漕運總督以朱宏祚爲浙江福建總

督

由廣東巡撫遷

○丙申以顧汧爲河南巡撫

由原任禮部右侍郎遷

調江有良爲

廣東巡撫

由安徽調

○予故河道總督靳輔祭葬諡文襄○予故原任

禮部侍郎富鴻基祭葬○辛丑以西安米價仍貴遣內閣學士德

珠等運襄陽米二十萬石於西安平糶○壬寅命都統希福爲建

威將軍帥師戍右衛○甲辰科爾沁土謝圖親王沙津奉命來京

上召入諭曰昔烏闌布通之役內大臣蘇爾達及爾等共商遣

爾屬下人鄂漆爾等於噶爾丹眾皆疑爾等已附噶爾丹矣將軍

薩布素等亦曾密奏以爲爾等有異心今又有烏喇佐領必立克

圖以噶爾丹遺爾之書密首朕思爾科爾沁自

太祖

太宗時

歸附世世職貢相爲媿親歷有年所爾必無此意朕略無所疑沙
津奏明臣世受隆恩斷無依附噶爾丹之理本欲引誘噶爾丹曾
遣鄂漆爾是實上密諭曰爾仍遣鄂漆爾誘噶爾丹至近地可
也○是月免江南鹽城六合等十二州縣旱災額賦有差○是歲
朝鮮來貢○人丁戶口二千三十六萬五千七百八十三田地山
蕩畦地五百九十七萬三千四百五十六頃三十四畝有奇徵銀
二千七百三十八萬五千六百三十一兩有奇米豆麥六百九十
五萬八千三百六十四石有奇草二百八萬三千四百六十五束
茶十五萬七千四百五十三引行鹽四百三十三萬三千四百三
十引徵課銀二百六十九萬七千一百六十三兩有奇鑄錢二萬
八千九百九十二萬五千四百有奇

東華錄

康熙五十一

臣王先謙敬編

臣周淪蕃恭校

康熙三十二年癸酉春正月丙午諭大學士等聞厄魯特噶爾丹無所得食困迫已極仰食於其所屬番人又有來哈密之信哈密於我邊塞相去最近可發甯夏駐防滿兵令往甘肅提督孫思克處爲之豫備孫思克所轄官兵亦當令其整頓豫備此外本省附近地方官兵有宜調發豫備者令孫思克一面調發一面奏聞又貝子察汗巴爾之弟班第自青海來時由大草灘於邊內行來遇伊拉古克三胡土克圖亦由邊內而往如此潛行來往邊塞官員何以不復稽察耶此亦當移檄孫思克邊塞官員令其嚴加戒飭爾等會兵部密議以聞○乙卯復設陝西西安驛傳道○甲子差

閱河工大學士張玉書刑部尙書圖訥還以河圖進呈 上問曰
高家堰水勢如何另築小隄果有益否張玉書等奏曰去歲黃水
大淮水被偏故洪澤湖水較高於往年今欲築小隄之處距高家
堰甚近若遇洪澤湖水漲高家堰大隄衝決小隄斷難保護前諭
旨所云小隄無益極是 上曰朕前揆之事理以爲無益爾等所
議甚當詳閱河圖問曰近來宿遷縣民生如何張玉書等奏曰宿
遷縣民間生計較勝從前自蒙 聖主指授河道順利又南巡之
後官吏奉公豪強畏法小民得所○禮部奏朝鮮國進貢禮物交
該衙門查收得旨朝鮮國世篤恤忱進貢方物克殫恭順頃復輸
應軍需捐進鳥槍三千桿可嘉年貢內黃金百兩及藍青紅木棉
嗣後永著停止○丙寅以高承爵爲安徽巡撫由福建布政使遷
二月乙亥朔諭大學士等西安米價尙爾翔貴戶部可招募身家

殷實各省富商給以正項錢糧並照驗文據聽其於各省地方購買糧米運至西安發糶所得利息聽商人自取之如此往來運販待西安米價得平之日但收所給原銀於地方大有裨益○丙子

上命內大臣公坡爾益等詣歸化城等三處督耕諭曰種地惟勤爲善北地風寒宜高其田隴尋常之穀斷不能收必藝早熟之麥與油麥大麥糜黍方爲有益去歲往彼墾種之人朕曾以此命之因違朕旨多種蕎麥以致田禾失收爾等須問土人宜種何穀易得收穫朕曾問老農皆云將雪拌種可以耐旱爾等試爲之朕前帶南方稻穀菱角種於京師雖以水泉灌溉因無南方池塘蓄養之水且又霜早難於成熟以此觀之若將此地穀種帶往北地亦難收成惟將麥與大麥油麥糜黍及早播種度可收穫爾等謹識朕言克勤無怠○九卿議准差閱河工大學士張玉書等奏高

家堰隄工惟史家胡至周橋最爲緊要若此隄失於隄防雖多築土隄數層俱屬無益自史家胡至周橋止一萬四百餘丈隄工應令總河等作速加築三官廟等六口俟竹絡朽壞時改用石工其見在石工應築土培護之處加土培護至高堰之隄應於每年歲修務令總河親身詳察勘明題報從之○辛巳以董延祚爲福建布政使

由按察使遷

○壬午理藩院奏員外郎馬迪等中途爲噶爾丹

人所害策妄阿喇布坦立遣沙克海喇圖等來奏 上賜策妄阿喇布坦敕曰朕統御寰區撫綏萬國中外一體果能始終效順則寵賚頻加爾策妄阿喇布坦僻處窮荒立心誠懇貢獻方物問安之使不絕於道是以屢遣達虎馬迪等加爾恩賜馬迪等中途被害爾卽遣使奏聞朕深嘉之今全受爾所貢物因爾使沙克海喇圖等歸賜爾以御用彩段十端爾所密奏諸情事朕已悉之矣○

巴圖爾額爾克濟農以前因逃遁人民失散奏請查歸得旨巴圖爾額爾克濟農失散之人可令所司查歸之○癸未 上御經筵○吏部兵部議准直隸巡撫郭世隆奏宣府所屬六廳俱係佐貳十衛俱係武弁予以臨民似爲未協宜裁六廳十衛改設一府八縣應設知府一同知一通判一知縣八敎職九縣丞二典史八驛丞七經歷一司獄一巡檢一又東城等六驛地處偏僻差使無多宜裁從之○甲申諭大學士等宗族之始皆一祖所生當力敦親睦共相愛恤扶持以爲生也今見諸王以下畧無親睦之誼或者同爲宗室以他祖父之名名其子若孫者有之今不定爲共相愛恤扶持之道長此安窮朕意此後入八分公以上諸吉凶事會集之禮依向所定者行之如未入八分公以下至於閒散宗室其吉凶之事亦宜定會集儀式若皆令入旗會集則不勝其繁矣其令

本翼會集馬喪事則一旗之中爲之服別旗惟去其纓又閒散宗室中有極貧者一有吉凶之事諸王以下閒散宗室以上各以其意量爲資助在出者旣不以爲難而得之者亦良有所益其會集時自其身之品級以下者而會集之閒散宗室無品級者則視其父之品級會集凡會集不至者有司察參如此則皆相識而相親不惟是也有爲不善者遇之亦可教以正若貧宗室亦不困於爲生此欲我宗室和協優游以安處之意也又宗室中見在名字有犯者宗人府悉察改馬自茲以往歲所送名亦卽詳察其有犯者駁之令改朕此旨汝等同滿洲尙書侍郎宣示諸王及閒散宗室令其會同定議以聞○丙戌以汪楫爲福建按察使由河南府知府遷○戊子諭大學士伊桑阿戶部尙書馬齊等聞噶爾丹艱於食窮困已極來就食於哈密哈密近在塞下若不豫爲設備乘隙生事其

時不及防矣今雖於甘肅令滿洲綠旗兵豫備而兵力尙單可自京師每佐領出兵二人由邊外往甯夏就提督孫思克處豫備更撥陝西總督標下火器營兵出二千人馬兵出千人亦遣往孫思克處令其豫備爾等與議政諸臣會同領侍衛內大臣索額圖郎談副都統阿南達議奏尋授郎談昭武將軍印以將軍博靈提督孫思克爲參贊○己丑諭大學士等往年山東旱會遭尙書蘇赫禱於泰山今歲陝西郡縣雨澤雖布而往者數罹旱災矣夫華山關中名山也宜遣大臣祀之爾等會同禮部議以聞○達賴喇嘛奏彭素克格隆達木奔爾囊素等齋到恩賜不勝懽忭上諭之意臣已明曉屢欲使喀爾喀厄魯特修好而生靈合有災眚弗能和協濟隆胡土克圖不克盡力雖有小愆仍求大君寬宥巴圖爾額爾克濟農儻許安插於西海可以保無盜賊而教之遵行法度

皇上各項差員遇舊時駐牧之人忽生亂端皆難辨晰伏祈鑒
宥蒙遣濟隆胡土克圖於噶爾丹諭彼遵誓但厄魯特大半附策
妄阿喇布坦雖諭以修好若厄魯特不從而生亂端則西海大小
土伯特力有不支伏祈鑒而察之至打箭鑪等處地方在漢人與
土伯特之間奉 皇上敕旨云土伯特行商者無用其止之是以
土伯特仍照前行漢人地方雖有妄爲之事如蒙古前往恐不當
聖心是以未經遣發以上情事俱已口陳於彭素克喇嘛乞仍前
頒賜溫諭奏至敕諭達賴喇嘛曰朕統御宇內撫綏萬邦好惡不
偏凡出令行政務本公誠以爲懲勸前者濟隆胡土克圖違旨僨
事已發敕諭爾喇嘛知之今爾喇嘛奏言濟隆胡土克圖不能盡
力雖有小愆仍望大君寬宥向爲喀爾喀厄魯特之事爾喇嘛節
次遣使皆不能體爾喇嘛之意後又遣濟隆胡土克圖亦不能體

爾喇嘛之意反與噶爾丹偕行殺掠喀爾喀入汎界劫取牲畜所
行兇悖以致厄魯特喀爾喀殘破人多死亡窮苦已極凡奉使行
人不悖旨而成事則賞以勸之違旨而敗事則罰以懲之國家一
定之大法也如或不然則善人何以爲勸惡人何以爲懲乎至巴
圖爾額爾克濟農以困窮而來歸朕朕優恤之使居賀蘭山俾得
其所乃忘朕綏養之恩妄生猜貳四處奔竄今窮而復歸朕又宥
其前愆安插之矣並無欲得其力欲用其力之心也今爾言巴圖
爾額爾克濟農安插西海卽可以無盜賊亦可敎之遵行法度爾
喇嘛何不卽撥人夫乘便遷巴圖爾額爾克濟農種類盡至西海
安插之乎爾喇嘛又言 皇上各項差員遇舊時駐牧之人忽生
亂端皆難辨晰伏乞鑒宥又言厄魯特大半附策妄阿喇布坦雖
諭以修好若厄魯特不從而生亂端則西海大小土伯特力有不

支伏祈鑒而察之朕遣使於爾喇嘛往來不絕途中無一舛錯爾喇嘛屬下人近邊而居歷年已久亦從未嘗啟釁生事況策妄阿喇布坦目下並無妄爲之事何所見而懸擬之乎苟有此等事端其時自有從公裁度之處爾喇嘛又奏打箭鑪交市之事殆欲屯戍之意也今天下太平並無一事爾喇嘛與我朝往來通使歷有年所何嫌何疑爾喇嘛如設立駐防我內地必量增戍守中外俱勞況我內地兵丁約束甚嚴非奉朕旨何敢私出邊境爾喇嘛但須嚴禁屬下不使妄行有何釁之可開戍兵之設似無用也特此遣大喇嘛垂喇克格隆根敦林辰格隆往諭○庚寅 上巡幸畿甸啟鑒○山西巡撫葉穆濟以病乞休允之○乙未 上自十里鋪乘舟往苑家口中途登河隄覽閱隄工召直隸巡撫郭世隆諭曰朕觀霸州所屬苑家口迤西舊隄傾圯處甚多今渾河泛溢西

偏眾流出水之處又復窄狹其勢必至直衝南隄儻有潰決則大
城文安等處必受水災殊爲可虞爾可詳加估計動正項錢糧加
增固築以防水患○調噶爾圖爲山西巡撫以于養志爲四川巡
撫○庚子 上還京師○辛丑諭大學士等衛旣齊係降級調用
一州判耳以其素有虛名特復其原官以檢討用又超擢爲布政
使未幾內升府尹累加遷擢至副都御史遂又授爲貴州巡撫身
受國恩可謂至矣爲府尹時其條奏疏中自謂比之召伯君陳假
若其所行者一二符其所言猶有可恕乃初至貴州時遂私動兵
革妄生邊事殺無罪苗民詐報軍功種種欺謊凡此惡行雖常人
所不爲而彼以古人自況反不知忌憚而爲之蓋於彼所言畧不
相顧而大負國恩矣彼平昔但務虛名妄稱道學委之以事毫無
實濟若不將此等人重懲則無以儆後之欺世盜名者爾等同九

卿召衛既齊問之○壬寅大學士等奏臣等遵旨詰問衛既齊據供從前年少無知曾經狂妄陳奏任府尹時條陳職掌又妄引古人以召伯君陳爲比罪當死及爲巡撫不能仰體 皇上愛民之心安撫地方輕率用兵致令無罪苗民被戮罪當死發兵之後又不能詳察虛實竟憑報文妄行奏捷罪又當死更有何辨等語衛既齊應照九卿原議擬立斬得旨衛既齊著從寬免死發往黑龍江○是月免江南沐陽縣去年水災額賦

三月丙午以秦省旱荒遣 皇子允禔祭華山 御製祭文○丁未移江西饒州府同知駐景德鎮○予故原任禮部侍郎王颺昌祭葬○己酉內閣以選取蒙古官學生八名充衙門貼寫奏聞上曰朕於包衣佐領下幼童特派專官敎習文義騎射多有成就卽微賤之子亦皆可觀由此言之幼童惟在訓迪苟加意敎誨未

有不成者騎射與文義原宜並重不可偏廢滿洲通文義官員卽用之行間未嘗不可近見國子監教習官學生甚屬委靡大不及前及八旗教習幼童亦皆懈怠幼時勤於教諭及長方得其用養育人材最爲緊要見在八旗幼童務宜選擇良師勤加訓誨爾等傳諭該都統知之茲所取蒙古官學生依奏選用○乙卯吏部議准巡視兩廣鹽課太常寺少卿沙拜奏兩廣鹽政向屬撫臣兼理課餉引目係驛鹽道提舉司經管臣蒙 皇上特簡所屬之員自應照例改設將驛鹽道改爲運司潮州一府離省寫遠行鹽亦多必得專員管理應將提舉裁去改設運同使駐紮潮州催徵課餉府吏目裁去改設運司知事提舉司廣盈庫大使改爲運司庫大使批驗所大使改爲運司批驗所大使廣州府有歸德等場惠州府有淡水等場爲鹽斤出產之所課餉之源必須設立分司催徵

巡緝從之○癸亥以王道熙爲江西按察使

由湖北糧道遷

○庚午諭大

學士等各省解送物料其中有無用者亦有此間購買易得者下戶部詳議其當解不當解者以聞○兵部奏甯夏鎮標騎兵二千四百步卒一千六百防守地方所關甚要今總兵官馮德昌將軍卽談等同赴甘州軍中則其標兵當酌量留守應作何領兵總兵官印務應畀才能者代理令與總督將軍提督商確奏聞得旨甘州有孫思克兵可令馮德昌獨往其甯夏鎮兵趙良棟身係舊臣可暫行管領

夏四月丙戌理藩院奏喀爾喀台吉車陵扎卜呈稱我父達什台吉本土謝圖汗六扎薩克中之一扎薩克也我向與族中弟姪六人及土謝圖汗叔父戴青諾顏之孫瓦齊賴怛喇胡土克圖之弟滾濟扎卜遇噶爾丹亂俱往投鄂羅斯今謹集眾來歸我願得與

西卜退哈灘巴圖爾同在克魯倫巴顏烏闌遊牧應如所請仍照喀爾喀初來之例賞以袍服布幣從之○丁亥諭大學士等昨日皇子允禔奏往祭華山每日行一百七十八里偪近潼關連兩三日泥濘難行一日止行百里至陝西見麥田甚好問總督佛倫云雨水甚調麥田頗好故流民回籍者甚多將播種銀兩發與州縣百姓時內有兩縣百姓云田已種完不用庫帑將銀繳回有自甘肅及秦嶺來者問之皆云雨水均調麥田甚好向日西安鳳翔饑民逃竄者眾今雖各回籍必秋禾有收方得安業若秋禾不登將如之何朕實憂之見今畿甸稍旱著禮部虔誠祈雨○壬辰諭兵部武鄉會試舊例射的以八十步爲則太遠善射者不能多中人材或致遺棄嗣後改爲五十步以中二箭爲合式○諭大學士等翰林官以文章爲職業今人好講理學者輒謂文章非關急務宋

之周程張朱何嘗無文章其言如是其行亦如是今人果能如朱
儒言行相顧朕必嘉之卽天下萬世亦皆心服之矣傳諭翰林官
知之○癸巳戶部遵諭議覆各省解送物料共九十九項京中無
貨買之物應令照舊解送外查所解印書紙張庫內見有存貯白
銅無應用之處應將此二項停其解送至於外解青粉等三十八
項價值並腳價合算比在京師價貴相應停其外解如有應用此
等物料之處在京照時價採買應用或遇時價騰貴辦買不得者
具奏行令出產省分解送從之○丁酉轉滿丕爲理藩院左侍郎
以西拉爲理藩院右侍郎由內閣學士遷○辛丑兵部議准直隸巡撫郭
世隆奏眞定府路當孔道地方遼闊請將紫荆關副將移駐眞定
改爲眞定協卽於各關營內的量繁簡共抽調兵丁一千四百名
並眞定原有兵六百名足二千名歸之副將統轄應設左右二營

守備除眞定營守備留用再以龍泉關守備移駐應設千總四卽以眞定營千總二員留用再以紫荆關千總一員移駐外另行派設千總一應設把總八卽以眞定營把總四員留用外另行添設把總四龍泉關參將移駐紫荆改爲紫荆關參將眞定營遊擊移駐龍泉改爲龍泉關遊擊從之

五月庚戌兵部奏歸化城乃總要之地增戍之兵甚多應專設將軍一員總管歸化城都統副都統訓練官兵凡當行事務協同右衛將軍而行得旨歸化城初設將軍總管官兵整飭訓練關繫甚重著領侍衛內大臣伯費揚古爲安北將軍管理○王子頒 御書萬世師表額於國學○丁巳先是以戕害員外郎馬迪事降敕詰問噶爾丹至是噶爾丹遣使齎奏陳情 上命發敕令彼使人齎回敕曰朕躬膺 天命撫綏萬邦凡恭順之國無不加恩以示

獎勸其有未孚者亦必曲加優容以匡正其非使歸於善前者朕遣員外郎馬迪等於策妄阿喇布坦爲爾屬下土克齊哈什哈哈爾海達顏額爾克所害敕爾查奏今爾奏言非但皇帝之使臣不宜爾也向來小國使臣亦無殺害之事敕使因遇羅卜藏林辰慙都滾布札卜是以見殺其名土克齊哈什哈哈爾海達顏額爾克之人雖在其內但原遣與哈密通問非自我教之行劫也害使臣者乃羅卜藏林辰等見在塔爾納齊納爾地方伊等情由想皇上早已洞鑒之矣諸凡大小罪過總祈皇帝如天之度兼容並包爾於朕敕未到之前護送使臣同行之格什等至嘉峪關奏其情事朕甚嘉許但爾旣已立盟修好則害我使臣之土克齊哈什哈哈爾海達顏額爾克等常卽擒拏治罪以戒後來橫行之人爾奏又言烏爾會地方兩尙書擊我儻其事有成將欲置我等於不堪我

等亦知非皇帝之旨其時已籲奏矣爾前者借追喀爾喀爲名犯我汎界掠我人民尙書阿喇尼等因巡汎界遇之彼凜遵國法率汎界蒙古兵與戰並非內地所遣之兵然此乃爾未誓以前事爾旣誓以後不得復執此以爲言又前者爾於烏闌布通地方前頂達賴喇嘛之佛誓不再違聖旨又跪於威靈佛之前誓不再犯中華皇帝屬下之喀爾喀以及眾民爾今奏言昔當濟隆胡土克圖內大臣吳丹塞爾濟之前跪告曰請將澤卜尊丹巴土謝圖汗兩人於所奏三言中以一言爲定逐出七旗歸於故土則皇帝覆育之蒙古再不爲非矣今亦不敢異於從前有所誑奏爾誓書印文猶在並無此等語爾奏此言與誓書原詞自相悖謬且朕安集喀爾喀之事已檄知達賴喇嘛並敕諭爾矣達賴喇嘛甚喜奏喀爾喀如彼饑困全加愛養同佛慈悲聞之不勝懽忭誠撫恤眾生如

赤子也其奏前已示爾爾亦當詳覩之矣日者達賴喇嘛因與喀爾喀澤卜尊丹巴胡土克圖土謝圖汗車臣汗諸台吉俱相隔數年未遣使通問今特遣其弟子綽木巴喀巴額木齊往問朕恐行路羈遲特遣官馳驛往送以此觀之達賴喇嘛以喀爾喀等向爲護法主加惠之意彰彰明矣爾今違誓仍索澤卜尊丹巴胡土克圖土謝圖汗等豈合達賴喇嘛之意乎況近今達賴喇嘛奏言儼厄魯特不從復生亂端西海大小土伯特力有不支伏祈鑒而察之達賴喇嘛與我朝往來通使多厯年所西海諸台吉不違朕旨恭順奉貢若厄魯特人等稍犯達賴喇嘛地方及西海地方朕卽立加征討斷不爽也前者爾敗於烏闌布通歸時人畜多死極其窘迫沿途委棄器械而去朕巡視汎界大臣直躡爾後皆目擊之今聞爾地乏食窮苦已極爾鄰近國土皆與爾爲仇策妄阿喇布

坦又與爾不睦從來諸國之人窮迫歸朕者養育皆如一體如爾窮迫來降前敕諭中已許活爾可卽徙至近邊當加厚恩撫養毋疑毋畏至喀爾喀扎木巴拉臧布胡土克圖乃此地敗壞釋教之罪人逃在爾所如果有用則留之不爾可卽發回今頒段十疋付爾使沙哈孫白克綽爾奔下齋往

六月乙亥頒 御書學達性天額於紫陽書院○禮部議覆國子監祭酒吳苑奏八旗學習制藝者日多而中額太少請增加名數查鄉試滿洲蒙古原取中十名今取中十六名漢軍原取中五名今取中八名會試滿洲蒙古原取中四名今取中六名漢軍原取中二名今取中三名從之○己丑大學士李天馥丁母憂命回籍守制○庚寅九卿議覆河南巡撫顧沅奏河南漕米俱向直隸小灘採買於民未便請改折停運應毋庸議得旨覽該撫奏河南漕

糧不出於本省百姓遠至直隸大名府小灘採買將漕米改折有益民生嗣後停止百姓採買但解京米石所關匪輕令該撫將改折銀兩親至大名府所屬地方照數採辦驗看起運儻有遲誤將該撫從重治罪○庚子諭大學士等朕每見各省往來及請安之人必問地方情形雨水霑足與否前問自江浙來者俱言今歲甚旱五月二十日尙未得雨朕幸江南深知彼處民生家無二日之儲所食之粟每日糴買若五月以後仍不得雨則米價騰貴貧民必至困苦此不可不豫籌者著遣戶部才能司官二員一往江南一往浙江詳問督撫觀雨水形勢來奏江浙地方雨水雖大若不沒禾穗則水消後禾卽復舊故澇不足慮旱則所蓄之水盡涸直無計可施朕又曾見舟中滿載猪毛雞毛問其故則曰福建稻田以山泉灌之泉水寒涼用猪毛雞毛則田苗茂盛亦得早熟朕記

此言將玉泉山泉水所灌稻田亦照此法果早熟豐收江浙稻田俱池中蓄水灌之池水不寒所以不用此也○是月免山西臨晉縣寇災額賦